



**PRIMEIRO  
MINISTRO**

**ALOKUSAUN BADAK  
SUA ESELÉNSIA PRIMEIRU-MINISTRU  
REPÚBLIKA DEMOKRÁTIKA TIMOR-LESTE,  
DR. RUI MARIA DE ARAÚJO,  
IHA BIBAN DADER-SAN RAI-HUN-MUTIN LORON ANZAC NIAN**

**Díli  
25abril 2016**



Palácio do Governo,  
Avenida Presidente Nicolau Lobato,  
Díli, Timor-Leste

Eselénsia, Embaixador Jonathan Schwass

Eselénsia, Embaixador Peter Doyle

Señora no señor sira,

Ónra boot ida mai ha'u, atu bele hato'o liafuan ruma, iha dader-san rai-hun-mutin ida ne'e, nebe selebra tradisaun ANZAC nian no aniversáriu dezembarke sira iha Gallipoli.

Priviléjiu ida mos mai ha'u atu bele partisipa iha eventu furak ida ne'e, nebe nakonu ho signifikadu ba povu rua, Austrália ho Nova Zelândia.

Ohin ita reflète kona-ba fetu no mane sira ne'ebé, luta hodi fo sira nia isin no ran, hodi hetan liberdade. Tradisaun ANZAC nian, halo ita hanoin hikas terus sira nebe sira hetan atu ita nia rejiaun, no mundu, bele sai livre.

Iha Timor-Leste ita rasik koñese aten-brani ema "ANZACs" sira nian. Iha Funu Mundiál da-Ruak, ita hetan soldadu australianu sira luta no mate iha ita nia rain. Sira maka ema ne'ebé merese naran boot no la hanesan ema bain-bain, iha hatada-an hasoru privasaun boot sira, bainhira sira kaer hasoru funu na'in boot ida, hodi defende sira nia país.

Timor-oan sira mos sente orgullu tanba sira nia ema barak maka fo-an ba matehodi apoia soldadu australianu sira ne'e.

Soldadu sira ne'e, barak maka ikus mai dedika sira nia-an hodi selu 'tusan ho onra' mai ita nia povu. Ohin ita fo onra ba ema australianu sira ne'e, tanba sira merese ita nia admirasaun.

Maski ita sei la haluha hahalok at hirak mosu iha Funu Mundiál da-Ruak nian, ita mos hatene katak iha funu ida ne'e, maka mosu tali-amizade no solidariedade hirak forte hodi halibur povu rua, Timor-Leste no Austrália.

Timor-oan sira mos hatene kona-ba aten-brani ema australianu no neozelandés sira nian, liu hosi INTERFET no misaun hirak hosi Forsa Internasionál Estabilizasaun nian iha Timor-Leste.

Atu koalia lolós deit, katak iha tinan 1999 no iha 2006, Austrália no Nova Zelândia sira hamrik iha ita nia sorin, hodi tulun garante paz mai ita nia país.

Karik Timor-Leste oras ne'e moris iha, tinan barak nia laran, ho dame, ida ne'e iha parte ida tanba kontribuisaun hosi soldadu Austália no Nova Zelândia nian sira. Ohin ita hakarak mos agradese ba sira nia apoiuno dedikasaun mai ita nia povu.

Ha'u husu lisensa atu hato'o deit katak ita presija hanoin hikas, la'os deit soldadu hirak mate iha funu laran, maibé mos hahalok at hirak hosi funu nian.

Iha Timor-Leste ita koñese barak liu kona-ba dezesperu no violénsia hirak mosu iha funu laran, nune'e mos ninia impaktu maka'as ba soldadu sira no ba sira nia família sira.

Nune'e maka, bainhira ita hakarak hanoin hikas ida ne'e, itas la'os deit fo onra ba ema veteranu sira maibé mos atu rekoñese katak pás ne'e importante.

Señora no señorsira,

Iha soleniidade ida ne'e, ita reflète no hanoin hikas ema hirak fo ona sira nia moris hodi ita bele sai livre.

Ita mos fo onra ba soldadu australianu no neozelandéz sira, ne'ebé mai hala'o ona sira nia servisu iha Timor-Leste no iha mundu rai klaran, tandeit liberdade.

Obrigadu wa'in.

25 abril 2016

Dr. Rui Maria de Araújo